

Keunikan UMS jadi Faktor Tarikan Pelancong

oleh: Badaria Bahar

Universiti Malaysia Sabah (UMS) merupakan salah sebuah universiti awam di Malaysia yang bukan sahaja menjadi pusat perkembangan ilmu, malah menjadi salah satu kawasan tarikan pelancong sama ada dari dalam mahupun luar negara.

UMS merupakan universiti awam yang kesembilan di Malaysia dan dianggap sebagai universiti yang tercantik di Asia Tenggara. Keindahan flora dan faunanya menggambarkan keunikan dan keindahan universiti ini.

Universiti ini memiliki landskap antara yang terbaik di Asia Tenggara manakala lokasinya yang menghadap Laut China Selatan, dikelilingi Hutan Hujan Khatulistiwa dan dibina di kawasan beralun adalah khazanah berharga dan menjadikannya antara yang terindah di rantau ini.

Menyingkap serba sedikit tentang perkembangan awal universiti ini, UMS ditubuhkan secara rasmi pada 24 November 1994 dan terpaksa menumpang sementara di Kolej Komuniti Yayasan Sabah di Likas pada tahun 1995 dan Kolej Latihan Telekom, Menggatal.

Kemudian pada bulan Jun 1999 hingga 19 Mei 2000, UMS telah berpindah ke kampus tetapnya kini di Teluk Sepanggar, Kota Kinabalu, Sabah.

Di samping itu, UMS juga mempunyai dua buah kampus cawangan iaitu di Wilayah Persekutuan Labuan dan di Sandakan.

Pada mulanya, Kampus Tetap UMS hanya mempunyai sembilan buah sekolah iaitu Sekolah Sains dan Teknologi, Sekolah Kejuruteraan dan Teknologi Maklumat, Sekolah Sains Makanan dan Pemakanan, Sekolah Perhutanan Tropika Antarabangsa, Sekolah Perniagaan dan Ekonomi, Sekolah Pendidikan dan Pembangunan Sosial, Sekolah Sains Sosial, Sekolah Psikologi dan Kerja Sosial dan Sekolah Pengajian Seni serta sebuah Pusat Penataran Ilmu dan Bahasa.

Pada tahun 2003, jumlah sekolah meningkat kepada 10 buah dengan penubuhan Sekolah Perubatan. Kampus Perubatan Desa yang terletak di Sikuati, Kudat menempatkan para pelajar Sekolah Perubatan.

Pembangunan fizikal UMS direka bentuk mengikut perancangan yang teliti dan disesuaikan dengan keadaan topografinya yang terletak di kawasan perbukitan menjadikan lokasinya dalam suasana beralun.

Universiti ini juga mempunyai kawasan pantai iaitu Outdoor Development Center (ODEC) atau Pusat Kegiatan Luar. Kawasan ini menjadi pusat penyelidikan, pusat rekreasi, pusat kegiatan pelajar dan banyak lagi.

Selain itu, UMS juga mempunyai muzium marin dan akurium yang digunakan untuk penyelidikan. Muzium ini dibuka kepada orang luar terutamanya untuk pelancong.



Outdoor Development Center (ODEC) di UMS.